




"Gavman mas was gut long wok bilong sios"



Mista Bernard Narokobi, Siaman bilong miting..

Bisop Zurewe Zurenuoc, hetman bilong Evanjelikal Luteran Sios.



Bisop Zurewe Zurenuoc, hetman bilong Evanjelikal Luteran Sios bilong PNG, i tokaut olsem: gavman i mas wokim arapela lo i ken mekim save long ol smolpela sios i bagarapim wok bilong ol bikpela sios long PNG.

Bisop i bin tok olsem bihain long wanpela pait i kirap long Morobe Provins namel long ol Luteran na ol memba bilong wanpela smolpela sios.

Konstitusen bilong PNG i tok olsem: olgeta manmeri i fri long bihainim wanem lotu ol i laik. Tasol ol i tambu long krungutim dispela fridom bilong narapela man.

Bisop i ting, Konstitusen bilong PNG i givim tumas fridom long ol lotu na sios long PNG.

Bisop Zurewe i askim gavman long larim tasol dispela kain pipel na grup pipel i kam insait long kantri - em ol i laik mekim kantri i go het, na i no paulim gutpela sindaun bilong ol pipel.

Mista Dick Avi, eksekutiv ofisa bilong Kaunsil bilong ol Sios bilong Melanesia, em tu i egens long sampela nupela sios i ken stat insait long PNG long dispela taim. Em i tok olsem: ol dispela liklik sios i kam insait nau long kirapim sampela nupela misin, i statim wanpela resis namel long ol sios. Ol dispela nupela misineri i save liklik tumas long PNG. Na ol bikpela misin i bin stap hia longtaim moa na i gat lokal lida bilong ol pinis.

Mista Avi i tok: pait i save kamap, sapos ol nupela misin i raun nabaut na pulim na grisim ol memba bilong ol arapela misin.

Em i tok moa: dipatmen bilong kastamis bilong gavman i mas lukaut bai ol nupela pipel i laik kam

insait long PNG, i mas autim tru watpo ol i kam.

Na dispela tok i mas stap klia long laisens bilong ol bilong kam insait.

Long wanpela bikpela kibung long Yunivesiti, Mista Bernard Narokobi, bipo em i hetman bilong ol komisin, i tok, yumi mas rausim olgeta misin long PNG.

Em i tok olsem: PNG i no mas gat ol misin skul, sapos ol i laik tisim ol memba bilong sios bilong ol tasol na i no olgeta arapela sumatin tu.

Na long dispela taim tu, administretiv seketeri bilong Westen Hailans Provinis, Mista Patrick Gaiyer, na administretiv seketeri bilong Sauten Hailans, Mista Ray Yaki tupela i askim gavman long makim wanpela komisin bilong glasim wok bilong ol misin na skelim gut.

Mista Gaiyer i laik bai gavman i mas wokim sampela lo bilong stiaim wok bilong misin, bai ol i ken bihainim gut wok bilong gavman.

Nau ol bikpela sios na ol provinsal gavman na



Pasta Dick Avi, eksekutiv opisa bilong Kaunsil bilong ol Sios bilong Melanesia.

arapela pipel i wari long dispela hevi i bin kamap namel long ol sios na i wetim tokbek bilong neselen gavman na bilong ol loman.

Ben Bitdu i bin raitim

NUPELA KOMIK

KAUNSILA TRAIM

PES 18



SIOS NA GAVMAN

Long narapela wik i go pinis wapelika bikpela kibung i kamap long Moresbi long Yunivesiti. Plant i pipel i kamap long kibung na Mista Bernard Narokobi bosim dispela kibung. Mr. Rob Robin, wapelika bikman bilong Yuni na Mista Patrik Gaiyer, wapelika bikman bilong Gavman i helpim Mista Narokobi, bosim dispela miting.

Ol i gat bikpela wari tru long ol sampela nupela misin i kamap nau tasol long PNG.

Dispela kibung i pulim longpela totok tru long painim rot bilong stretim ol dispela trabel.

I luk olsem. I no nau tasol dispela kain trabel i kamap long PNG. Inap sampela yia nau ol planti nupela misin i kam insait long PNG na i wok long resis wantaim ol sampela misin i stap longtaim tru insait long kantri.

Plant i dispela nupela misin i kirapim bikpela trabel insait long ol wan wan ples. Ol i paulim tingting bilong planti man ha sampela i bihainim nupela misin na sampela i strong long misin bilong bipo.

Gavman i wari tru long dispela trabel. Bikos dispela trabel i no helpim asples long go het. Nogat tru. Planti ples i bruk bruk nabaut na pipel i no bung wantaim. Pipel i no wok wantaim. Ples i no go het.

Dispela kain trabel i kamap pinis long planti ol nupela kantri long Esia na Afrika. Ol i pilim bikpela hevi tru ra ol i pasim sampela lo bilong mekim indai ol dispela trabel.

Yumi nia long PNG i wari tru long dispela trabel na wok hat long painim we long pinism. Yumi tingting tru long dispela hap insait long Konstitusen i tok: PNG i wapelika kantri we olgeta man i fri long bihainim wanem kain lotu ol i laikim. Gavman o sios i no inap pasim laik bilong ol wan wan manmeri. Yumi olgeta man i bilip dispela tok i tru. Yumi olgeta i no laik tru bai dispela tok bilong Konstitusen i no karim kaikai. Olsem yumi longlong tru long painim we long stretim dispela bikpela trabel.

Mipela hia long Wantok i tingting planti long dispela trabel na mipela i pilim olsem. Dispela trabel i no stat insait long PNG. Nogat tru. Dispela trabel i kamap long ol sampela man i kalap i kam long PNG, na i wok long tanim tingting bilong planti man. Olsem mipela hia long Wantok i tingting olsem. Dispela trabel i no trable bilong lotu. Em i wapelika trabel ol sampela ausait man i bringim long PNG. Gavman i mas lukluk gut na tingting gut. Sapos planti trabel i kamap long ol nupela man i kam insait long PNG, orait gavman i gat pawa long pasin rot long man i laik kam insait long kantri. Isi tru long tambuim. Sapos nupela misin, o nupela lotu i laik kam insait long kantri, i ken tok: Sori, mipela inap pinis. Mobeta yu go long arapela kantri.

Las tok bilong mipela hia long Wantok i olsem. Dispela trabel i no trabel long konstitusen, em i wapelika trabel i kam long arapela kantri. Olsem em i samting bilong kastam opis bilong gavman. I no samting bilong senisim konstitusen. Yumi mas senisim sampela lo bilong kastam opis tasol.

KROS LONG RENT

Mista John Noel, Minista bilong bosim of Haus na Taun, i tok olsem: Nau pasin bi-long baim rent long ol haus bilong gavman i no stret.

I gat tupela dipatmen i bosim ol haus: gavman na Hausing Komisin. Na tude of man i stap insait long ol haus bilong hausing komisin i mas baim bikpela rent na bilong gavman nogat.

Mista John Noel, Minista bilong bosim ol Haus na Taun, i tok olsem: Nau pasin bilong baim rent long ol haus bilong gavman i no stret.

I gat tupela dipatmen i bosim ol haus: gavman na Hausing Komisin. Na tude ol man i stap insait long ol haus bilong Hausing Komisin i mas baim bikpela ren na bilong gavman nogat.

Olsem na gavman i ting long apim rent bilong ol pipel i stap insait long ol haus bilong gavman. Ol man i baim rent inap long K15.95 nau, long yia 1980 bai ol i haim K18.00. Long 1981 em bai K31.00, na long 1982 bai i kam inap long K52.00. Na long 1983 inap long K75.95 kamap long inap long K81.00

Ol pipel i stap long ol haus bilong gavman, em ol man i save wok long gavman na i ken tekewe sampela rent long pe bilong ol. Tasol ol pipel long ol Hausin Komisin haus i no save wok long Hausing

Komisin. Olsem na ol i no ken tekewe rent long pe na ol i mas baim rent i antap moa.

Plant i taim man i rentim gavman haus i kisim wankain pe olsem man i rentim Hausing Komisin haus. Tasol man i stap long gavman haus i mas bai liklik rent tasol.

Mista John Noel, memba bilong Goodenough Open long Milne Bay, i bin statim wok bilong em olsem ministra long de namba 5 bilong Janueri.

Em i tok bai ol i senisim nem bilong Hausing Komisin, na bai ol i kolin em Nesenel Atoriti bilong wokim na bosim ol haus.

Dispela bai i olsem wapelika bikpela kampani tru na i mas winim mani olsem

olgeta arapela bisnis kampani. Bai i no gat dinau moa bilong baim haus.

Long wok bilong em bilong bosim ol taun, Mista Noel, i tok, em i laik kirapim pasin bilong helpim ol pipel long statim na ranim sampela smolpela bisnis i pas gut long pasin bilong ol lokal pipel long sindaun. Olsem: sapos yumi laik go kaikai, yumi no mas go insait long ol hotel i gat kolwin na olkain bilas insait long em.

Nogat. Na sapos yu laik fiksim su bilong yu, yu no mas go long wapelika wok-sap bilong su i kostim planti mani.

Mista Noel i laik tu bai i gat moa lait long ol striot o rot insait long taun. Ol stilman i no laikim lati.

Julia Daia i bin raitim

Mr. John Noel, Nupela minista bilong ol Wok long Taun

wantok
Niuspepa bilong ol Papua Niugini stret

National weekly in Melanesian Pidgin.

Editorial Offices:
P.O. Box 1982
Boroko

Phone: 25 2500
Telex: NE 22213

Advertising:
In P.N.G.
Georgina Gaiger
Phone: 25 2500

Australia:
Peter Halse Associates
Sydney
Phone: 29 7527
Telex: 21 409

Subscription Rate:
Annual: K8.00



TARANGU PRAI

Bai i go we?

Tupela fridom paitman bilong Wes Irian i kalabus yet long Bomana na i no bin painim wanpela kantri i laik kisim tupela na givim ples bilong sindaun long tupela.

Jakop Prai na Otto Ondawame i bin kalapim mak namel long Wes Irian na Papua Niugini long mun Ogas na ol plis i bin kalabusim tupela inap tu mun long dispela.

Tupela fridom paitman bilong Wes Irian i kalabus yet long Bomana na i no bin painim wanpela kantri i laik kisim tupela na givim ples bilong sindaun long tupela.

Jakob Prai na Otto Ondawame i bin kalapim mak namel long Wes Irian na Papua Niugini long mu mun Ogas na ol plis i bin kalabusim tupela inap tu mun long dispela.

Tupela lida ya i pait long kisim independens long Indonesia. Ol lokal pipel bilong Wes Irian i no laikim ol Indonesia i bosim ol.

Bihain tupela i winim tu mun pinis long kalabus, gavman i pasim tupela yet, long wanem em i no laik tupela i stap long PNG. Na Yunaitet Nesens i bin traim painim wanpela kantri i orait long tupela i

ken go sindaun long en. Tasol inap nau ol i no bin painim wanpela. Australia, Nu Silan, Fiji, Solomon Ailan, na Wes Samoa i tok nogat. Sampela wantok bilong Prai na Ondawame i stap long kantri Holan; tasol em i no laikim moa pipel olsem.

Tupela meri bilong Prai wantaim ol pikinini i bin kalapim mak na kam insait long PNG i sindaun nau long Sekotchiau viles long Wes Sepik Provins.

Wanpela ofisa bilong Foren Afeas Dipatmen i tok olsem: "Mipela i warilong ol dispela pipel. Mipela tu i pipel. Tasol mipela i no inap bringim meri na pikinini i go long Bomana. Na wanpela samting moa: planti kantri i no laikim man i gat tupela meri... na i no laik dispela kain man i kam insait. Marit long tupela meri i egens



Jacob Prai wantaim ol soldia bilong em long Wes Irian.

long lo bilong ol."

Prai na Ondawame i bin askim gavman long larim tupela i sindaun i satp long kem bilong ol pasindia long Oksapmin long Wes Sepik. Tasol gavman i no laik na i pret bai tupela inap kirapim sampela trabel namel long PNG na Indonesia.

Tokman bilong gavman i ripot olsem: "Long mun Epril, taim mipela i bin kibung wantaim tupela, mipela i bin tok strong long tupela, bai tupela

inap kalabus sapos tupela i kalapim mak. Tupela i save pinis. Na tu mipela i no ken larim tupela i ranawe."

Mista Tom Unwin, man i bosim wok bilong helpim ol pasindia man na ol tarangu, em man i makim Yunaitet Nesens, i bin raitim wanpela pas i go long Papa Krismas na askem em long painim kantri i laik kisim Prai na Ondawame na wan handet arapela Wes Irian. Em i tok olsem: Ol i no stap gut nau; ol i stap long ol kem na ol i no hepi; ol i pret.

Melanesian Kaunsil bilong ol Sios i bin makim wanpela spesel komiti bilong helpim ol dispela tarangu i bin ranawe i kam long Wes Irian. Long Krismas taim em i bin salim sampela mani long helpim ol baim kain kain gutpela kaikai long Krismas.




NUPELA STEM



Long 24 Janueri bai P&T i salim sampela nupela stem long ol Pos Opis insait long PNG. Dispela ol nupela stem i soim ol sampela musik bilong bipo.

Nupela 7t stem i soim wanpela manbu bilong Simbu. Ol i save wokim long graun. I gat tripela hol long en, na kala bilong en blu.



Nupela 20t stem i soim wanpela guita bilong Nu Briten i gat wanpela string tasol. Ol i wokim long limbum na rop bilong bus.



Nupela 28t stem i soim 'launut' bilong Nu Ailan. I olsem arapela kain garagut. Krai bilong en i olsem nek bilong balus o wanpela liklik enimel.



Nupela 35t stem i kam long Nu Hanova. Em i wanpela manbu ol i winim long nus.



HUSAT PINISIM MANI

Dia Edita — Mi laik autim sampela wari bilong mi. Wari bilong mi i go olsem.

Long 15 de bilong mun Desemba, mi bin harim long N.B.C. nius long 8 kilok olsem Madang Provinsal Gavman i bin peim primia, namba tu primia, seketeri, plena na ol ministra bilong en. Ol wokman i kisim gutpela pe tru.

Gavman i givim dispela mani bilong kirapim Madang Provins, tasol bilong wanem mai ya i save go insait long poket bilong ol wokman tasol. Man, mi harim long redim olsem pe ol wokman i save kisim i no liklik.

Dispela mani gavman i givim bilong wok insait long Madang, na ol i no salim bilong ol wokman tasol. Sampela ol ples olsem Bundi, Tauta, Karkar Ailan na Wara Sapalae i kisim pinis dispela mani gavman i salim long mekim wok insait long hap bilong ol. Tasol sampela ples olsem Bogia, Saidor na Usino, na ol arapela ples tu insait long Madang i no kisim yet mani bilong ol.

Wok insait long Madang i no pinis yet, olsem na Provinsal Gavman i mas lukluk gut, na em i no ken spenim mani nating. Maski wansait tasol, lukluk gut na mekim wok i go stret.

Em tasol, sapos wanelala wantok i lukim dispela toktok na em i gat bikpela belhevi na i gat laik long kruim tok bilong mi, orait em i ken rait tasol i go long Wantok, o niuspepa bilong yumi stret.

Bade Biula,
Laiagam/Enga Provins.

MUSIK LONG HOTEL

Dia Edita — Yu inap long givim liklik spes long mi bai mi putim liklik wari bilong mi. Wari bilong mi i go olsem:

Hia long hap mi stap long en, em long Maprik, mi save lukim long Maprik Hotel ol wokboi bilong hotel i save pulim dispela masin bilong putim 20t na pilaim singsing i kam na putim long ples bilong dring bia.

Taim man i dring em i no sindaun gut, em i spak pinis, orait em i kirap na mekim save tromoim lek i go i go, na wanem samting i kamap? Bikpela pait tru.

Traim na putim dispela masin tasol long haus kai-kai. Taim ol i save tromoim lek, dispela strong bilong dring i save i go tru long kru. Na man ya em i spak pinis, na em i no save wanem samting em i wokim. Man, hotel long Maprik em i namba 'tu densing hal stret.

Man i bosim i save lukluk na em i tok, em i orait. Tasol bihain pait i bruk na menesa ya em i longlong olgeta. Plisman i no inap long wokim. Wanpela samting, bikos ol plisman pret long ol i paitim ol. Ministra bilong bosim dring i mas traum na glasim gut wok bilong ol menesa

bilong hotel. No ken slip tumas long Moresbi.

Em i wok ol i bin sanapim yu long glasim, olsem na em i ran orait o nogut. Sapos nogut, plis traum na sanapim liklik. Nogut em i pundaun olgeta. Em tasol.

Edward Aki
Maprik, E.S.P.

DIM LAIT

Dia Edita — Mi gat liklik wari long ol draiva long Hagen taun. Wari bilong mi olsem.

Mi save lukim planti ol draiva long Hagen taun ol i no save givim sain lait longwe long ol pipel i ken ting, o yes dispela ka i laik go long dispela hap, olsem mi mas go long wanpela hap long rot.

Ol i save givim din lait olsem hap yad tasol, dispela em i no stret long ai bilong mi. Ol pipel i ting olsem ka bai inap i go long wanpela sait, olsem na ol i save go namel long rot. Tasol ka i save go namel long rot, na taim ol man na meri i lukim ka i kam klostro tru long ol, ol i save painim rot long go ausait long bikrot.

Sampela taim ol draiva i save kilim ol pipel i dai, na sampela taim ol i abrus long ol. Plis ol draiva, sapos yu husat i harim, o

ritim dispela pas, yu mas bihainim. Yupela i mas givim sain lait longwe liklik long ol pipel bai ol i ken lukim na save na wokabaut stret. Ol draiva i ken i go klostro tru na givim sain lait long ol.

Sampela taim ol pipel i go pinis long namel bilong rot, na long dispela yupela i save kilim ol i dai. Olsem na yupela ol draiva i mas tingim gut na draivim ka gut. Sapos yu laik bekim pas yu ken rait i go long Wantok Niuspepa.

Stephen Yawage
Mt. Hagen/W.H.P.

BRUKIM PAS

Dia Edita — Yes, nau mi laik autim liklik wari i go long yupela ol manmeri i save wok long pos ofis.

Olgeta taim mi save kisim pas, tasol mi lukim olsem ol i brukim pinis. Ating ol pos masta tasol i brukim, mi no save tasol mi rait i go long Wantok Niuspepa.

Ating yupela i mas klaim gut tingting bilong ol pos masta. Na narapela samting mi save harim tok, win olsem olgeta taim ol i save brukim, o opim pas bilong mipela. Sampela ol pren bilong mipela ol i save salim poto, o mani, o klos na samting, na ol i save opim. Em i olsem ol i stil. Olgeta samting bai i kam olsem wanem?

Plis putim gutpela bilip man, o kristen man long pos ofis. Em tasol long liklik tingting bilong mitupela.

Vincent Puriki,
na Moses Wawa,
Ialibu/S.H.P.

WANTOK SISTEM

Dia Edita — Inap long yu givim liklik spes na bai mi ken putim liklik wari bilong mi. Plis, wari bilong mi i go olsem.

Wanpela taim mi go long Panguna long Not Solomons Provins, na mi go insait long bikpela opis bilong Kopa na mi askim long wok. Na wanpela man bilong Tolai i tok, sori mipela i nogat wok.

Em i tok olsem na mi kam ausait, na bihain wanpela Tolai ya i givim wok long wantok bilong em.

Mi lukim na mi sori stret. Olsem na sapos yu husat i belhat long dispela tok, orait rait tasol long Wantok Niuspepa na bai mi ken ritim.

Mista Peter Kep
Steamships/Mt. Hagen

SIOS HELPIM PIPEL O NOGAT

Dia Edita — Hia mi laik autim sampela wari bilong mi. Yes, wari bilong mi i go olsem.

Plis, tru ol nupela sios yupela kamap nau tasol na mekim mipela i paul nabaut na lusim ol bilip bilong mipela. Long wanem, wanpela kamap na tok, mi Krais Jisas, mi mekim mirakel olsem Jisas. Mi ken mekim lek nogut i kamap orait, mekim aipas i op, na lukluk na daiman bai i kirap gen.

Ol dispela kain i paulim tru olgeta kristen na ol i sut nabaut long painim bilip. Dispela i wankain tru long hap bilong baibel i tok, planti giaman profet bai kamap bihain na mekim olgeta dispela samting mi wokim nau na yupela i lukim. Olsem na mi bilipim dispela tok i stap long baibel, yupela ol giaman profet tasol.

Yumi ken ritim dispela hap tok i stap long Luk Luk 21:8-9 olsem na mi pret moa long yupela ol nupela sios i kam nau tasol na bagarapim bilip bilong ol gutpela kristen man na meri long Papua Niugini.

Olsem na mi laik tok olsem, plis yupela i no ken pulim o mekim samting long laik bilong yupela na giamanim ol manmeri, na pulim ol nabaut olsem ol haiden. Nogat wanpela haiden manmeri i stap, olgeta ol i kamap baptiso na kisim mak bilong Jisas pinis na ol i kamap nupela manmeri. Na yupela ol nupela sios (misin) i kamap na bagarapim bilip bilong ol. Yupela i mas sem long ol giaman pasin bilong yupela.

Mi lukim dispela i kamap long ples bilong mi, na olgeta man na meri i paul tru. Plis, mipela ol katolik sios i no save putim kain tok gris, o kain giaman tok olsem i go long ol pipel. Nogat. Mipela i save autim tasol tok bilong God long ol pipel, na mekim stret wok bipo Jisas Krais i bin mekim long dispela graun.

Yupela i no pulim pasin bilong man yet, mi sem tru. Yu husat i laik bekim pas, o skruim pas, em i orait tasol. Tenkyu.

A.O. Toliva
Boroko, N.C.D.

Banny Banuni
Waremes Village/Madang

IS SEPIK

Is Sepik provins i gat niuspepa bilong em stret, nem bilong em IS SEPIK NIUS. Em i bin kamaut samting olsem tupela yia nau na olgeta yia em i kamaut 6-pela o moa taim. Wanpela wokman bipo i stap long Wantok Nius-pepa, tairi em i kamaut long Wewak, em yet i wokim dispela niuspepa. Nem bilong em Albert Singer bilong Kairiru Ailan. Dispela taim ol i gat kala long namba wan pes; na ol i gat edvetais tu insait long pepa.

Is Sepik Provins i redi nau long provinsal ileksen bilong em. Bai ol i opim taim bilong nominesen long de namba 20 bilong Janueri na ileksen bai kamap long 24 Februeri inap 10 Mas.

Pater Kerubim Dambui, interim primia bilong Is Sepik Provins, i tok bai em i putim nem bilong em insait long ol long nomineen long wanem em i bin kirapim sampela wok long provins, na sapos ol i ilektim em primia, em i laik mekim ran gut ol dispela wok na bihain soim ol arapela man long pasin bilong ranim.



Pater Cerubim Dambui - Is Sepik Primia in sindaun stori long Wantok ripota long opis bilong em.

Long dispela provins ol i gat 33 ilektoret. Bai wan wan ilektoret i ilektim memba bilong hap bilong em bilong go insait wokim provinsal asembli. Pater Kerubim bai putim nem bilong em insait long ilektoret bilong Wewak na i no bilong hap bilong em long Timbunke.

Long Is Sepik provinsal gavman ol i save mekim olgeta miting na kibung long Tok Pisin tasol. Na konstitusen bilong ol na olgeta samting olsem i long Tok Pisin tasol. Em bai

olgeta memba i ken harim na save gut long olgeta tok.

MANUS

Long mun i go pinis, 5-5-pela meri i bin lusim Papua Niugini na i go stap insait long wanpela bikpela kibung bilong ol meri long Pasifik. Kibung ya ol i kolin Pasifik Wumens Konfrens.

Meri i stap wok olsem Riset Ofisa na i makim Memba bilong Manus, Mis Pauline Doover, wantaim Mek Taylor, Louise Aitsi na Umei Waineti i bin go stap insait long dispela kibung.

Mis Doover i bin tokim Wantok ripota long Manus olsem, as tingting bilong Pasifik Wumens Konfrens, em i bilong bringim ol wari bilong ol meri. Ol bai toktok long ol dispela wari na tra'im long stapim sampela wari wan wan meri i gat long dispela kibung. Na tu ol bai tokaut long wanem kain divelopmen i kamap long ol kantri insait long Pasifik long wok bilong ol meri.

POLIS FAMILI

Poto i soim Sab-Inspekte Gibson Yawa wantaim meri bilong em Poliswoman Miriam Yawa. Tupela i gat wanpela pikinini, Lorraine. Em i gat 3-pela yia pinis. Tupela i namba wan polis famili insait long PNG. Nau tasol Miriam i pinisim kos bilong em na kamap polismeri. Tupela i bilong Moribi na wok long Mosbi.



Not Solomon

Poto antap i soim Father Peter Kurongku bilong Siwai, North Solomon Provins. Em i namba wan pater bilong Katolik Sios long PNG ol i makim em bisop bilong wan pela kantri ausait long PNG Pater Peter bai i kamap namba tu bisop bilong Honiara, Solomon Ailans.

Pater Peter i kamap pater long 1966. Inap nau em i wok long No Solomon Provins.

PROVINS NIUS



Planti meri i bin krai insait long kibung, long wanem, ol divelopmen isi tumas long ol sait bilong meri. Kantri i bosim ol i isi tumas, na i les long lainim ol samting.

KOPRA TAKIS

Minista bilong Finans, Mista Barry Holloway, i tok pinis long putim takis gen long ol kopra ol i salim long C.M.B. (Kopra Maketin Bod). Minista i tok takis bilong kopra bai i 2½%. I olsem long olgeta wan kina ol bisnis man i kisim long kopra bilong em bai gavman i tekewe 2.5t. Em i samting olsem K9 long ol wan wan tan kopra.

Minista i putim pinis dispela nupela lo na Siaman bilong C.M.B., Mista W.J. Grose, i daunim pe bilong kopra. Tasol i no olsem pe i go daun. Nogat. Gavman i autim hap mani bilong takis na pe bilong kopra i daun liklik.



RESIS LONG DROIM KALA PIKSA

Namba wan prais: K300

Namba tu prais: K100

Namba tri prais: K50



Long yia 1980 bai ol i wokim bikpela so tru long Papua Niugini. Nem bilong em "South Pacific Festival of Arts". Em i namba tri taim nau ol i mekim; bipo ol i mekim long Fiji na long Nu Silan. Dispela so bai ran planti de moa na i gat planti tausen kain samting yu ken lukim long en. Bai i gat planti tausen manmeri i wok long en na planti tau-
sen moa bilong planti kantri bai kam lukim ol samting ol i bungim i stap long so.

Insait long dispela so bai ol i gat planti kain danis na singsing na musik na plaua na spot na gem na pilai na pasin
bilong kukim kaikai na olkain kaving samting na bilas bilong wan wan kantri na film na muvi na kanu na haus. . . .
Na ol dispela kain samting bai soim pasin bilong wan wan kantri bilong ol wansolwara bilong Pasifik. Olsem na ol i
kolin em "South Pacific Festival".

Nau ol manmeri i wok long redim dispela so, i singaut na tok save olsem: ol i laikim sampela manmeri bilong ol
Pasifik kantri i pentim o droim sampela piksa i gat kala. I gat wanpela resis long dispela. . . . Na yu ken droim o
pentim hamas piksa yu laikim. Yu ken droim olgeta kain samting i soim pasin na kalsa bilong kantri bilong yu o
ples bilong yu. Yu ken pentim o droim man meri pikinini i bilas long singsing, wanpela naispela haus, naispela ples,
wanpela singsing, ol manmeri i sindaun wokim samting bilong ples olsem kanu o sospen o kaving samting, o yu ken
wokim bilas nating olsem ol i gat long ples. Mekim, wokim long laik bilong yu.

Yu mas pinisim dispela wok bilong yu na salim piksa i kam bipo long de namba 31 bilong mun Mas, 1979. Bai ol
saveman i glasim gut ol dispela piksa, na long mun Me 1979 bai ol i givim tripela prais.

Yu ken salim planti piksa, long laik bilong yu. Skul bilong yu o klas bilong yu tu i ken rhekim olsem.

Ol piksa i mas luk
olsem. . . . tasol ol i ken
bikpela o smolpela maski
long sais bilong ol. . . .

Piksa i mas gat kain kala long en; tasol yu no ken raitim
sampela tok long en.

Sapos yu gat sampela gutpela tok, yu mas raitim long narapela
pepa.

Salim i go long:

The Chairman
South Pacific Festival of Arts
Box 6918
BOROKO.
PAPUA NEW GUINEA.

MIS ROSE KEKEDO KISIM M.B.E

"Traim bes bilong yu na yu no ken wari." Mis Rose Kekedo namba wan meri insait long Depatamen bilong Edukesen i tok olsem long ol PNG meri.

Mis Rose Kekedo em i kisim pinis wanpela medal bilong Kwin yumi kolim M.B.E. (Memba Bilong Britis Empaia). Ol i givim dispela medal long em long makim ol bikpela wok em i mekim pinis long helpim wok bilong edukesen i go het long PNG. Em i stat long edukesen long 1960 na em i holim wok i go inap nau.

Tude em i Komisina bilong Tisa Sevis. Em i save wok long Konedobu.

Mis Kekedo i tok olsem, "Wok bilong mi i hat tru. Mi save lukautim ol tisa insait long PNG. Sapos

ol i gat wari long haus, o wari long posting, o ol dipatmen i laik fenism, o i gat trabel long famili, ol i kam long mi tasol. Plenti ol tisa meri i save salim pas long mi na tokaut long wari bilong ol. Sampela i save ring long mi long opis long autim wari bilong ol. Sampela arapela ol i kisim balus na kam stret long opis long autim wari bilong ol. Long tingting bilong mi, yumi mas wok hat tru long helpim ol tisa. Nogut ol i wari na les nabaut."

Bipo Mis Kekedo i namba wan Seketeri bilong Tisa Edukesen. Em i olsem wasman bilong olgeta Tisa Koles insait long PNG. Em i was bai olgeta wok insait long koles i mas bihainim 8 poin plan bilong gavman.

PIS KEK (PIS NA KAUCAU)

Ol samting yu mas i gat:

1 pela tin pis
4 pela kaukau
liklik grimpela anian
2 pela kiau
sol
gris bilong kukim kaikai

Rot bilong wokim:

1. Rausin skin bilong kaukau na kukim long wara wantaim sol.
2. Taim kaukau i kuk pinis rausim na brukim i go malumalu wantaim fok.
3. Katim anian i go liklik.
4. Brukim tin pis i go liklik tru.
5. Tanim tin pis, anian na kiau wantaim kaukau na miksim gut.
6. Kisim liklik na wokim i go olsem bol.
7. Putim gris long prapian na putim i go antap long paia.
8. Praim kek long tupela sait.
9. Kaikai taim i hat yet.

Sapos yu nogat pis, yu ken miksim mit wantaim kaukau na praim.

**PREN BILONG YU
INAP OLTAIM**

wok.' Mi kam long helpim yupela bai yupela ken kamap gutpela tisa. Bihain, isi isi ol i save gut long mi na mipela wok wantaim. Mi, na staf na ol student mipela olgeta i wok wantaim.

Mis Kekedo, wanpela bikpela meri insait long PNG, i laik givim dispela toksave long olgeta meri. Yu no ken wari, traim bes bilong yu: Wok hat. Wok wantaim ol man. Yu no ken pait wantaim ol. Bikos man wantaim meri, tupela wantaim, i mas wok sapos kantri bilong yumi i laik go het.

Mis Kekedo i winim komuniti skul long Dogura long Milne Bay Provins. Em i pinisim St. 6 taim i gat 11 yia tasol. Ol i salim em i go long tisa trening long Popondetta long mekim "A" kos sertifiket. Em i tren pinis, tasol em i no gat yia inap long go tis. Olsem em i wokim wanpela eksam. Em i winim dispela eksam na ol i salim em i go long St. Mary Koles, Chartertown. Em i skul inap em i pinisim Kwinslan Junia Setifiket.

Mis Kekedo i kam bek pinis long PNG na em i go gen long Port Moresby Tisa Koles long yia 1960 na 1961. Skul pinis em i go tisa long Bavaro Komuniti Skul. Em i tis hia long 1962. Long 1963 na em i tis long Hohola. Aug 1965 em i go bek long Port Moresby Tisa Koles long mekim senia Opisa Kos. Tasol i no gat narapela meri i stap long dis-

PES BILONG OL MERI



pela kos wantaim bikpela lain man. Olsem ol i salim em i go long North Sydney Demonstration School bilong ol Infan. Em i skul hia wampela yia na kam bek long PNG.

Em i kam bek pinis na kisim wok long tisa long Port Moresby Tisa Koles.

Long 1967 Miss Kekedo i ga bek gen long skul long Admin College. Em i pinisim pinis skul hia na long 1968-1969 em i skul long Madang Tisa Koles. Long 1969 em i go long wanpela bikpela skul long Amerika ol i kolim University bilong Colorado, U.S.A. Em i skul moa long tupela yia na kisim setifiket ol i kolim Bachelor of Arts. Long 1972 em i kamap Retmasta bilong Port Moresby Tisa Koles.

Julia Daia i bin raitim



LO BILONG YIA 1963 – 1973 BILONG BOSIM OL LAISENS BILONG STRONGPELA DRING

TOK SAVE LONG OL EPLIKESEN I BIN KAMAP

Bilong bihainim olgeta tok bilong Lo bilong yia 1963 – 1973 bilong bosim ol laisens bilong strongpela dring, mipela i tok save hia olsem: bai mipela i putim kibung long wan wan provins na distrik bilong skelim eplikesen bilong ol pipel i putim nem bilong ol long dispela pepa. Bai mipela i makim de na ples bilong dispela wan wan kibung long wan wan distrik.

HUSAT I APLAI

**WANEM KAIN
EPLIKESEN**

**WANEM KAIN
LAISENS**

PLES

CHIMBU PROVINCE

1. YOKONDOBOMGUME CLUB	Nupela Eplikesen	Klap	Guo Village, Kundiawa
2. DAKA KINDINE	Nupela Eplikesen	Stuakipa	Iwai Village, Kundiawa
3. KOMBUKUKANE VILLAGE TAVERN	Nupela Eplikesen	Taven	Kunabau Village, Kerowagi

EAST NEW BRITAIN PROVINCE

1. JOHN MARANGU	Nupela Eplikesen	Stuakipa	Duke of Yoke Island
-----------------	------------------	----------	---------------------

ENGA PROVINCE

1. YAPERENN (YARAMANDA BUSINESS GROUP)	Nupela Eplikesen	Stuakipa	Yaramanda Village
--	------------------	----------	-------------------

MANUS PROVINCE

1. JULIUS SION	Nupela Eplikesen	Stuakipa	Andra Island, Lorengau
----------------	------------------	----------	------------------------

NEW IRELAND PROVINCE

1. ALPHONSE TANI	Nupela Eplikesen	Stuakipa	Luon Village, Miliamana
2. LUCAS SONA	Nupela Eplikesen	Klap	Lumakaua Village
3. BLAISE BOSEP	Nupela Eplikesen	Klap	Losuu No. 2 Village East Coast
4. POSIKEI ULAWAI	Nupela Eplikesen	Stuakipa	Nopius Village, Kavieng
5. JOHN LUGU (AMBOL AFIRFIR AFIRFIR FAMILY)	Nupela Eplikesen	Stuakipa	Bulam Village, Anir Island

NORTH SOLOMONS PROVINCE

1. MONLUS GROUP	Nupela Eplikesen	Stuakipa	Monlus Village, Selan Area
2. NAROMURI SPORTS & SOCIAL CLUB	Nupela Eplikesen	Klap	Pakia Village
3. DAMA OSI CLUB	Nupela Eplikesen	Klap	Dama Osi Village, Kieta
4. EIVO AMATOTO CLUB	Nupela Eplikesen	Klap	Itaupa Village, Kieta
5. A.T.C. STAFF & SOCIAL CLUB	Nupela Eplikensen	Klap	Sect 24, Reserve. Arawa
6. ANSELM TAPUANA	Nupela Eplikensen	Stuakipa	Rorovana NO. 2 Village
7. KAANUNG PUU RECREATION CLUB	Nupela Eplikensen	Klap	Dinguna Village
8. PETER KIATA	Nupela Eplikensen	Stuakipa	Okai-Hagu Village

DATED at Port Moresby this 28 December 1978



WILLIE TAUGAU
CHIEF COMMISSIONER

Poto long lephan i soim 3-pela bikman bilong Jermani i sanap long ples balus long Moresby. Tupela i kam toktok wantaim Nesenel Gavman long painim sam-pela we Jermani inap helpim PNG. Kirap long lephan bai yu lukim Mista Josef Hansen, Mista Winfried Boell na Mista Josef Kansy Vice Kaunsil bilong Jermani.



Tupela as bilong pawa Tupela kain Berec bateri

Dispela tupela kain bateri i min pawa. Pawa bilong radio, kaset-radio, na sutlam.

Olsem mipela i kolim ol: bateri bilong olkain pawa. Ol i save mekim olkain wok.

Ol i wokim long Englan, na ol i putim pawa insait long ol bilong stap long-taim. Yu ken bilip long Berec bateri.



Gat Olkain Pawa

exclusive distributors

Seeto Kui (PNG) Pty Ltd.

BOROKO
Ph. 254700

LAE
Ph. 421111

GOROKA
Ph. 721892

MT. HAGEN
Ph. 521679



**HIGHLAND WEAVERS
PTY LTD.**

MIPELA YET I SAVE LUMIM OLKAIN
SAMTING OLSEM: MAT NA PONSO NA
KOLSINGLIS NA BLANKET

Yu ken baim ol dispela samting long stua bilong
mipela klostu long Bird of Paradise Hotel long
Goroka.

O yu ken rait long mipela long:
Highland Weavers Pty. Ltd.
P.O. Box 599
GOROKA

1979

Yia Bilong Provin sel Gavman



Somare Tokaut

Namba wan tingting bilong gavman bilong yia 1979 em i long helpim ol pipel long ples, we ol i no bin kisim sampela helpim bipo. Praim Minista Michael Somare i bin tok olesem.

Em i tok: Mipela i laik givim moa mani long ol pipel i sindaun long ples na i stap longwe long taun. Sapos yumi helpim ol taun tasol, dispela kantri i no ken go het gut. Mipela i laik helpim go het wok helt na edukesen na gavman long ol viles we i no gat ol dispela samting inap nau.

Em i tok, gavman i laik helpim ol viles pipel long kirapim sampela smolpela bisnis, na wokim gutpela rot i go long ples bilong ol bai ol inap bringim ol kai-kai i kam long maket na winim wan siling bilong ol.

Tasol gavman i no laik helpim ol pipel i sindaun nating. Nogat. Sapos ol pipel i taitim bun long go het, em nau, dispela kain pipel gavman i laik helpim.

Mista Somare i tok moa: Dispela kantri i yangpela. Em i gat ol strongpela lida. Mipela long gavman i bin soim strong bilong mipela long yia i go pinis. Yumi ken amamas long gutpela gavman i save ranim kantri gut.

Long yia 1978 gavman i strong long bringim provinsal gavman i kam long wan wan provins. Nau gavman i mas soim ol pipel bilong ol dispela provins, provinsal gavman i ken helpim ol na i no bilas nating bilong ples.

18. Sandaun
Aitape-Vanimo Rot - K200,000
Masin bilong helpim telepon - Lumi-Nuku-Vanimo - K2,000,000

7. Is Sepik
Stretim Wewak Taun - K300,000
Nanu Amaku Bris - K85,000

Madang
Madang-Usino Rot - K1,650,000
Wara Saplai - K6,071,000
Bundi Pawa - K37,000


8. Saten Hailans
Poroma-Koroba Rot - K8,000,000
Kaupena haus kop

13. Westen
Ok Tedi wara pawa - K1,500,000
Rumginae-Ningern Rok - K1,000,000
Malaria Kontrol - K348,000

11. Galp
Malalaau - Kerema Rot - K25,000
Hiritano Haiwe - K50,000
Kadiba-Kerima Rot - K220,000

Na wapelala samting moa: Ol primia na hetman bilong ol provinsal gavman i no ken yusim bikpela mani bilong go limlimbur long ol ausait kantri. Nogat. Ol i mas yusim mani pastaim long helpim go het wan wan viles.

Provinsal gavman em i mas helpim olgeta pipel. Em i no gat wok long putim mani insait long poket bilong smolpela lain lida. Na tu ol lida bilong



Nesnel Gavman i givim bikpela pawa tru long ol Provins bai ol i ken raunim ol wok insait long provins. Long piksa hia bai yu ken painim provins bilong yu na lukim ol bikpela wok i laik kamap long 1979.

Gavman i tingting tru long helpim ol dispela 4-pela bikpela wok insait 5 yia i laik kamap.

Saten Hailans	Rural developmen projek
Is Sepik	Rural developmen projek
Oro	Higaturu Wel Pam
Wes Nu Briten	Bialla Wel Pam



INDEPENDEN KANTRI BILONG PAPUA NIUGINI

OI lo bilong ileksen bilong provinsal gavman, bilong 1977.

PASIN BILONG MAKIM ILEKSEN OPISA

KOMISIN BILONG BOSIM OLGETA ILEKSEN, long pawa em i kisim pinis long hap namba 5 bilong lo bilong bosim provinsal gavman ileksen bilong yia 1977, na long strong bilong olgeta arapela pawa mi holim, mi mekim nau dispela tok save:

Nau mi makim ol dispela man yumi painim nem bilong ol i stap long lephan bilong dispela pes daunbilo, olsem opisa bilong bosim ileksen long wan wan provins, nem bilong en i stap long raithan daunbilo.

NEM BILONG OPISA	PROVINSAL GAVMAN	NEM BILONG OPISA	PROVINSAL GAVMAN
John Gigmai	Ambunti	Blasius Vaninara	Maprik
John Gigmai	Burui	Blasius Vaninara	North Wosera
John Gigmai	Gaui	Blasius Vaninara	South Wosera
John Gigmai	Hunstein Range	Blasius Vaninara	Tamaui - Yamil
John Gigmai	May River	Blasius Vaninara	Wam - Urat
John Gigmai	Upper Sepik	Kelly Vaero Onipay	East Yangoru
Bella Seiloni	Angoram	Kelly Vaero Onipay	Numbo
Bella Seiloni	East Coast	Kelly Vaero Onipay	Sauso
Bella Seiloni	Karawari	Kelly Vaero Onipay	West Yangoru
Bella Seiloni	Keram	James Koikoi	Boiken
Bella Seiloni	Lower Sepik	James Koikoi	But - Dagua
Bella Seiloni	Middle Sepik	James Koikoi	Schouten Islands
Bella Seiloni	Yuat	James Koikoi	Turubu
Blasius Vaninara	Albiges - Mamblep	James Koikoi	Wewak Islands
Blasius Vaninara	Bumbita - Muhiang	James Koikoi	Wewak Local
Blasius Vaninara	Gawonga	James Koikoi	Wewak Town
Blasius Vaninara	Kombio - Urim		

Mi yet mi raitim dispela tok long de namba 5 bilong mun Janueri long yia 1979.

R.T. KAIULO

KOMISINA BILONG BOSIM OLGETA ILEKSEN

INDEPENDENS KANTRI BILONG PAPUA NIUGINI

OI lo bilong ileksen bilong provinsal gavman, bilong 1978

PASIN BILONG MAKIM ILEKSEN OPISA

KOMISIN BILONG BOSIM OLGETA ILEKSEN, long pawa em i kisim pinis long hap namba 5 bilong lo bilong bosim provinsal gavman ileksen bilong yia 1977, na long strong bilong olgeta arapela pawa mi holim, mi mekim nau dispela tok save:

Nau mi makim ol dispela man yumi painim nem bilong ol i stap long lephan bilong dispela pes daunbilo, olsem opisa bilong bosim ileksen long wan wan provins, nem bilong en i stap long raithan daunbilo.

NEM BILONG OPISA	NEM BILONG PROVINS	NEM BILONG OPISA	NEM BILONG PROVINS
John Tembon	Tapini	Nenai Kora	Rigo East Coast
John Tembon	Aiware	Nenai Kora	Rigo Inland
Luiana Iskel	Fane	Nenai Kora	Rigo North
Luiana Iskel	Zarima	Nenai Kora	Rigo West Coast
Rarua Gamu	Gape Rodney	Roney Evara	Bereina
Rarua Gamu	Aroma	Roney Evara	Kuni
Rarua Gamu	Marshall Lagoon	Roney Evara	Nara/Kabadi
Joe Fragi	Hiri East	Roney Evara	Mekeo
Joe Fragi	Hiri West	John Ine	Amazon Bay
Simon Barnaly	Mr. Koiari	Daraus Dorke	Cloudy Bay
Simon Barnaly	Sogeri Valley	Napolian Kaimala	Woitape
Nenai Kora	Rigo Central		

Mi yet mi raitim dispela tok long de namba 5 bilong mun Janueri long yia 1979.

R.T. KAIULO

KOMISINA BILONG BOSIM OLGETA ILEKSEN

ASKIM NA BEKIM



NO KISIM WANTOK

Dia Wantok,

O yes yupela ol man bilong prinim Wantok Niuspepa na salim i kam long ol man, mi i gat bikpela wari. Yupela i save salim o niuspepa yupela i no salim stret. Mi save kisim Wantok biahain long 10-pela or 11-pela de. Olsem na mi askim yupela. Taim bilong wikend mi amamas

long kisim Wantok Niuspepa long P.O. Box 644, Mt. Hagen.

Tasol mi kisim biahain long 10-pela o 11-pela de. Olsem mi askim yupela long salim stret long Fride o Sarere long olgeta wik. Long wanem mi i gat bikpela amamas long lukim Wantok Niuspepa long wan wan wik.

Andrew Dokta
Box 644
Mt. Hagen

BEKIM

Dia Andrew,

Gutpela askim bilong yu. Mipela amamas long salim Wantok Nius i go long yu long Box 644, Mt. Hagen. I tru sampela man i no kisim Wantok kwik. Tasol i no asua bilong mipela hia long Wantok. Long olgeta Fonde mipela bringim Wantok i go long Pos Opis hia long Boroko. Sampela taim nius i hariap i go long Hagen na sampela taim i no go kwik. Sapos yu wet plenti de orait yu mas go lukim Posmasta

long Hagen na askim em long Wantok Niuspepa bilong yu.

“BLUT PRESA”

Mi gat wanpela askim mi laik askim ol save man long bekim. Askim bilong mi go olsem. Sampela taim long dispela yia mi bin ritim toktok bilong Helt Minista. Helt Minista em i toktok long ‘presa bilong blut’. O long tok inglis yumi save tok ‘blood pressure’.

Plis inap yu toktok gut long mipela. Wanem samting em ‘presa bilong blut’. Na tu wanem samting bai mipela wokim long rausim dispela sik sapos em i sik. Tenkyu.

Mi, Eva Lapi
Balupwine Komuniti Skul
Maprik.

BEKIM

Blut presa em i min strong bilong blut i ran

insait long rop blut insait long bodi. Spaos yu opim tep long tan wara, wara i ken ran hariap o isi isi. Dispela strong bilong ran bilong em yumi kolim “presa” bilong em. Sapos em i strong moa, yumi save tok “presa i hai”.

Sapos dispela presa o strong bilong ran bilong blut long bodi j moa yet, yumi save tok dispela man/meri i gat hai blut presa — “high blood pressure”.

Sapos ran bilong blut insait long bodi i strong tumas, o i hai, planti samting nogut i ken kamap long bodi. Hat i ken bagarap, planti taim het i pen, man/meri i save sotwin, ai i save raun. Sampelea taim i gat pen long bros. Hai blut presa inap long kilim man/meri idai.

Dispela sik hai blut presa i save kamap long ol pipel i patpela tumas o i bin smok planti, o i bin dringim planti strongpela dring planti taim. Na tu i save kamap long ol pipel i save wari tumas long olkain samting, na iuria na

i seksek long ol liklik samting nating.

Pasin bilong stretim dispela sik, em i long tambu long ol samting i as bilong em. Tambu long kaikai planti planti switpela samting i gat suga na i mekim yu patpela — olsem rais na bret na bata na gris na kain samting olsem. Tambu long smok. Tambu long dring.

Dispela sik hai blut presa em i wanpela sik i save kamap long ol lapun na ol bikpela man/meri i pat tumas. Sapos man o meri i yangpela yet na i smok planti na i dring planti — em bai kisim hai blut presa taim em i no lapun yet.



EM I NUPELA

MITSUBISHI L200

i strong na smat



Brek

Nupela kain brek, ensin i helpim strong bilong em.

Ensin
Narakain:
4G23 OHC, i
gat 1,597 c.c.



Sap bilong tanim wil i gat
3-pela hap bilong en.

TOBA PTY. LTD.

MORESBY 25 6888
LAE 42 2611



MITSUBISHI L200

MITSUBISHI L200 WAN TAN PIKAP TRAK

Yu ken baim long ol biktaun bilong PNG.

TOBA PTY. LTD.

MORESBY 25 6888
LAE 42 2611



PRE BILONG PLANIM KAİKAI

"God, you yet you givim olgeta dispela kaikai long han bilong mipela. You yet you tok,

"Sapos man i laikim kaikai, em i mas wok hat na tuhat bilong em i pundaun, orait, bai em i ken painim kaikai".

Olsem na long tok na strong bilong yu tasol mipela planim dispela kaikai. Na sapos yu no tok, na yu no putim ol dispela kaikai, bai mipela i no gat kaikai nau long dispela taim.

Mipela i save, olgeta samting i kamap na i stap long laik na strong bilong yu tasol.

Nau mipela i planim dispela gaden kaikai long laik na tok bilong yu. Ren, san, lait na tudak i save kamap na i stap long strong bilong yu. Dispela graun nau mipela i planim kaikai long en, em yu bosim, yu yet yu wokim.

Sapos yu laik, kaikai i kamap gut. Sapos yu no laik, kaikai i kamap nogut; em long laik bilong yu tasol.

Helpim mipela na blesim mipela bai mipela oltaim tingting stret long ol samting mipela i kisim na tenkim yu long en.



Agricultural College,
P.O. Box 30,
Banz, W.H.P.

Mista Steven Letempo (16)
Mista Jim Darami (17)
Mista John Opul (20)
Mista John Inaho (18)
Mista Anton Er (22)
Mista Zawie Wenga (19)
Mista Tawi Waina (20)

Catholic Mission Tabele,
Village Yassa,
Manam Island,
P.O. Bogia,
Madang Province.

Alvina Konaka
Alma Sika
Marie Magun
Rose Rupunai
Rose Sono

Catholic Mission Sassoja,
P.O. Box 682,
Wewak,
East Sepik Province.

Mathew S. Kriniam (21)
Paul D. Yalingin (20)
James A. Jerry (24)
Tony K. Yohui (21)

South Pacific Timbere,
P.O. Box 89,

Lae,
Morobe Province.

Katu Kaitung (21)
Kaukisa Kandy (18)
George Todi (18)
Busil Zamang (17)
Dabi Saking (21)
Keds Kandy (17)
Ambu G. (20)

Baire Youth Club
Portion No 355
P.O. North Sangara,
Popondetta,
Northern Province.

David B. Itari (20)
Kag Amburo (15)
Gag Amburo (12)

Arawa Technical College,
P.O. Box 85,
Arawa,
North Solomons Province.

Michael Aigal
Taranga Taipan
Stanley Bomanus
Lelesi Orovea
Aisak Ravin
William Tobin
Andrew Philip

Teosin Theodore
Ray Mition
Silvester Tudina



PROVINSAL ILEKSEN (INTERIM PROVISENS) 1978

TOK SAVE LONG TEKEWE WOK BILONG OPISA BILONG BOSIM ILEKSEN

KOMISIN BILONG BOSIM OLGETA ILEKSEN, long pawa em i kisim pinis long hap namba 5 bilong lo bilong bosim Provinisal Gavman ileksen bilong yia 1977, na long strong long olgeta arapela pawa mi holim, mi mekim nau dispela tok save:

Nau mi tekewe wok bilong Richard Kila Vagi, olsem opisa bilong bosim ileksen long Sentral Provins. Dipsela i bihainim lo bilong makim ol opisa bilong bosim ileksen, em ol i bin wokim long 9 Jun 1978, na i bin prinim insait long "National Gazette" namba G54 bilong 22 Jun, 1978.

Mi R. T. Kaiulo, Komisina bilong bosim ol ilektoret, i bin sainim dispela long 5 Janueri 1979.



PROVINSAL ILEKSEN (INTERIM PROVISENS) 1978

TOK SAVE LONG TEKEWE WOK BILONG OPISA BILONG BOSIM ILEKSEN

KOMISIN BILONG BOSIM OLGETA ILEKSEN, long pawa em i kisim pinis long hap namba 5 bilong lo bilong bosim Provinisal Gavman ileksen bilong yia 1977, na long strong long olgeta arapela pawa mi holim, mi mekim nau dispela tok save:

Nau mi tekewe wok bilong Allen Jonathan, olsem opisa bilong bosim ileksen long East Sepik Provins. Dipsela i bihainim lo bilong makim ol opisa bilong bosim ileksen, em ol i bin wokim long 9 Jun 1978, na i bin prinim insait long "National Gazette" namba G54 bilong 22 Jun, 1978.

Mi R. T. Kaiulo, Komisina bilong bosim ol ilektoret, i bin sainim dispela long 5 Janueri 1979.

BEKIM OL MEMBA



Paiale Elo

Dia Edita – Dispela tok i kam long ol lain pipel bilong Koroba-Kopiago. Tok bilong mipela i go

long Palamen.

Plis, wanem kain toktok tru yupela i save mekim long palamen? Mipela i no klia gut long toktok bilong yupela ol minista nabaut. Ating yupela save holim miting long palamen na i no save tingting long baksait, o biahin bilong yupela.


Mipela i bin go raun long nambis, na lukluk raun long ol bikpela haikul na haus sik, em long lukim wanem samting i narapela kain long hap bilong mipela. Yupela ol hetman i mas bekim dispela tok bilong mipela.

Sapos mipela i stap arere tru long boda, na yupela ol hetman i lusim tingting long mipela, dispela tupela ples Koroba na Kopiago i joinim Irian Jaya, Papua o Niugini. Yupela ol hetman i stap long palamen i mas bekim dispela askim bilong mipela. Husat tru i lukaumtum Koroba na Kopiago?

Na tu wapelam samting i no senis liklik, tasol toktok tasol i wok long antap moa. Mipela laik save wanem man, o gavman bai i helpim Koroba na Kopiago long ol wari bilong mipela.

Em tasol, sapos wanem man o memba i gat belhevi, rait tasol i go long Wantok Niuspepa.

Tim Leneo,
Koroba/Kopiago



Asimboro Ston

Dia Edita – Yes ol wantok, yupela inap long autim wari bilong mi insait long Wantok Niuspepa. Wari bilong mi i olsem.


Mi gat bikpela amamas tru long toktok bilong Mista Asbro Ston, Memba bilong Ambunti na Dreiki-kir. Em i bin toktok long senisim olgeta wok insait long hap bilong Ambunti na Maprik. Mi bin harim dispela tok na mi ting em i gutpela long senisim haus sik na wokim haus balus.

Na tu klinik gut taun, na wokim haus pawa na ol arapela wok olsem. Mi bin amamas tru long harim dispela toktok bilong Mista Ston long redio. Olsem na mi tu mi sapotim toktok bilong em.

Tasol wanem taim tru bai Is Sepik Provinis Gavman i kirapim ol dispela kain wok. Olgeta hap i gat lektrisiti o pawa pinis, ol ples olsem Maprik, Angoram na Wewak, tasol Ambunti i no gat haus pawa o lektrisiti.

Em tasol long liklik askim bilong mi.

William S.W.,
Ambunti/E.S.P.



Clement Poye

Dia Edita Mi laik



OPIS BILONG INKAM TAKIS

TOK SAVE BILONG OL PEPA BILONG STRETIM INKAM TAKIS BILONG 18 MUN I PINIS LONG 31/12/1978.

FORM "S" – Bilong ol manmeri husat i kisim weses long bos na arapela pe olsem interes, dividens o arapela winmoni sapos i go antap long K 100 long wapelam yia. Ol i mas salim dispela pepa bipo long namba 28 de long mun Februari, 1978, na pasim olgeta waitpela (orisinal) grup setifiket bilong weses na ovataim insait long en. Sapos yu no salim olgeta grup setifiket na pulmapim pom "S" stret, bai Inkam Takis Opis i no ken hariap long wokim pepa bilong yu.

FORM "B" – Bilong ol bisnisman o patnasip na tras husat i gat tred stua, P.M.V. o i wokim kakau, kopra, kopi, lipti, wel pam, raba o kaikai i salim, o wanem kain arapela bisnis em yet i wokim. Ol bisnisman, patnasip na tras i mas salim pom "B" bipo long namba 28 de long mun Februari, 1978.

FORM "C" – Bilong ol kampani bilong yia i pinis long namba 31 de long mun Desemba, 1978. Ol kampani i mas salim pom "C" bipo long namba 28 de long mun Februari, 1979.

Sapos yu no pulmapim ol dispela kain pom gut, na pasim olgeta grup setifiket wantaim em, Opis bilong Inkam Takis i no ken hariap long bekim refun sek o assessmen bilong yu.

GRUP EMPLOYA.

Ol bos bilong wokman o grup employa i mas stremi Grup Reconsiliasin Statemen na salim bipo long namba 24 de long mun Februari, 1979.

J.W. LOHBERGER,
Nambawan bilong Inkam Takis Opis

autim wari bilong mi, na na wari bilong mi i olsem. Memba bilong mipela long Sina Sina Open ilektoret, Mista Clements Poye, i bin promis long helpim ol pipel long ilektoret bilong em.

Em i tok long stapim olkain trabel i save kamap insait long Sina Sina. Na tu em i bin tok, em bai toktok strong long palamen long bringim olkain projek i kam long Sina Sina.

Na tu em i tok, em bai wokim bris na rot. Ating em i mauswara tru. Mipela i no save harim nem bilong em long redio na niuspepa, ating em i save pasim maus tasol long palamen.

Em tasol long liklik wari bilong mi, sapos husat man i laik skruim toktok bilong mi, orait rait tasol i go long Wantok na mi ken lukim.

Joseph Eremuge
Kundiawa/Chimbu Provinis



MAMBU I KAMAP WE?

Dia Edita - Mi laik bekim pas bilong susa ya Hildai Meiwau, Vanimo, Wes Sepik Provin.

Hildai, mi bin lukim pas bilong yu long Sarere namba 11 de bilong mun Novemba. Long pas bilong yu, yu tok, mipela ol Sepik i save paitim mambu bilong Madang long stringben bilong mipela ah? Hildai yu rong liklik, mambu i no kam long Madang. Nogat tru. Mambu i kam long Not Solomon.

Susa, sapos yu tambu long mipela long ol mambu, orait moa gut olsem yumi ol blakskin i no ken pilai gita. Long wanem, gita i no bilong yumi, em i bilong ol waitman. Na tu yu mas save olsem gita, mambu, raba dram, sel kokonas na garamut na botol top em ol instramen tasol.

Mi laik tok klia gen long susa ya Meiwau, mambu i no kam long Madang, em i kam long Not Solomon. Sapos yu gat belhevi, orait rait tasol i go long Wantok, bai mi lukim, tenkyu.

Albert Wori,
Port Moresby/N.C.D.

AUTIM SIK

Dia Edita - Inap long yu givim liklik spes na bai mi putim liklik wari bilong mi long Wantok Nius. Wari bilong mi i go olsem.

Taim ol man i kisim sik long as, o rot bilong pepekpek, ol i save sem long tokaut, olsem na ol i save giamanim ol dokta na nes. Na ol i save tok, sik ol i no bin kisim long en.

Yu husat man o meri i giaman olsem na sapos yu dai em i asua bilong husat? Yu kisim wanem kain sik, yu mas tokim stret long ol

wokman na wokmeri bilong haus sik, o et pos. Ol i no inap semim yu, o krosim yu. Nogat tru. Em i wok bilong ol.

Ol bai helpim yu na stremtik sik bilong yu. Pren yu mas tingting gut pastaim taim yu laik i go kisim marasin. Yes, mi no min long mi daunim yu, nogat. Yu husat man o meri yu save giaman, nau mi tokim yu stret. Em tasol na tenkyu.

Henry Hiruma
Laiagam/Enga Prov.

MASKI WANTOK

Dia Edita - Plis, mi laik autim bikpela wari bilong mi, na i orait long yu givim liklik spes long mi. Em hia wari bilong mi.

Mi amamas tru long ol wok bilong ol tisa bilong nambis na maunten. Mi save ol i mekim gutpela wok tru, tasol insait long Saten Hailans mi lukim olsem, ol tisa bilong arapela ples i kam long ples ol i tis long en na karim sampela boi long skul, na bihain ol i pinisim gred 6, ol i suvim boi ya i go long haiskul. Mi ting dispela pasin i pulimapim spes bilong ol boi na meri bilong dispela skul.

Plis ol tisa tingting gut. Dispela boi i gat skul long ples bilong em, na em i mas i go skul long ples bilong em. Taim papamama bilong ol pikinini long as ples ol i lukim dispela pasin, ol i kros tumas.

Mi lukim dispela kain pasin long planti yia long skul. Mi laikim kaunsil na skul inspekte i mas lukluk long dispela. Mi no toktok long pikinini, tisa, o plisman ol i transpea wantaim pikinini long en. Em i orait, em tasol wari bilong mi.

Wali Akali
Margarima/S.H.P.

WOKBOI NATING

Dia Edita - Mi gat sampela wari olsem mi lukim sampela kampani i gat planti waitman i pulap long wok. Mi wanelala boi bilong Tambul viles, mi bin wok long A.T.A. na Beechwood kampani inap long 6 yia olgeta. Na mi bin lukim planti waitman i

kam yet long Papua Niugini.

Ol waitman tasol i bos long ol draiva na liklik wok insait long dispela kampani. Mi stap longpela taim moa tasol mi pilim em i no stremtik, na mi no kisim bikpela mani. Mi wok long woksap olsem mekenik.

Wok mipela i mekim i bikpela wok, tasol ol masta ol i no mekim wok, ol i toktok tasol na hariapim mipela long olgeta wok na ol arapela samting tu.

Em i wari bilong mi, mi laik yupela i tokaut long nius long radio, o long niuspepa. Mi laikim bai yupela i mas bekim gut, mi laik harim na i ken amamas long yupela.

Peter Apra
Maun Hagen/W.H.P.

Salim ol pas
i kam long:
WANTOK
BOX 1982
BOROKO

YUMI WAN KANTRI

Dia Edita - Mi wanpela man bilong Hailans. Mi no save raitim pas long Wantok Niuspepa tasol em i namba wan taim bilong mi long autim liklik wari bilong mi. Em i wari bilong mi i olsem. Bipo tru taim Bougainville Kopa i bin stat, nogat wanpela man bilong Nambis i kliarim ol bus o opim rot samting. Na ol Hailans tasol i bin kam na mekim ol dispela samting. Tasol nau Bougainville ya em i kamap taun pinis na ol i bin digim kopa tu. Olsem na ol man bilong Nambis i kisim ol gutpela wok.

Na ol Nambisman yupela tasol i sindaun long emploimen opis tu. Olsem na mipela ol sampela Hailans i lusim skul long Fom 4, 6, na fom 2, na mipela save i kam painim wok long Bougainville. Na mipela i kam insait long askim long wok na ol i tok: Sori mipela nogat wok.

Ol i tok olsem nau mipela wet i stap na sampela ol man bilong nambis i go insait. Ol i bin kisim dispela man i go long opis bilong em na tokim ol long

filim Eplikesen Fom. Na ol save givim wok long dispela man, wantok bilong em yet. Ol i mekim olsem na mipela i bel hat tru.

Bilong wanem? Em ol narapela kantri long yumi Papua Niugini. Tasol yupela Nambis tasol PNG, na mipela ol Hailans i bilong narapela kantri? Yupela i ting wanem na kisim ol wantok bilong yupela yet, na yupela i no kisim mipela ol Hailans?

Long PNG mipela i no gat planti samting olsem gol, wel ol dispela samting tasol. Kopa ya em i wanpela tasol. Na mipela i ting wan wan man bilong ol wan wan provins bilong mipela i ken wok em i orait tasol. Yupela ol Nambis yupela i selpis tru long wok.

Kisim ol wantok tasol. Em i no gutpela pasin bilong yupela. Sapos yupela lukim dispela hap liklik wari bilong mi, orait, yupela o ken mekim olsem. Na kisim husat man i kam pastaim long askim long wok. Em tasol wari bilong mi. Wanpela man bilong yupela i laik bekim pas bilong mi, orait, rait tasol i go long Wantok Niuspepa.

Liyer Por,
Panguna/Not Solomons

NEKS ILEKSEN BAI YU LUS

Dia Edita - Hia mi gat sampela wari. Sapos yupela inap raitim kamap long Wantok Niuspepa. Em nau wari bilong mi i go olsem.

Planti taim mi save lukim ol ministra i save mekim olsem. Sapos mipela ol pipel i laik go sindaun na autim sampela wari bilong mipela long ol. Na ol i save tok wet liklik. Na mi laik go long dispela hap.

Tasol ol i save mekim wanem? Bai ol i go i stap i stap long ples bilong em o wanem hap em i go long wok bisnis bilong em. Na tu mipela i save i stap wet

wet. Nogat. Nau taim bilong ol long go bek long Port Moresby na bai em i tok, o maski taim i pinis. Bihain mi kam bek long narapela taim, orait bai yupela i ken autim wari bilong yupela.

Dispela kain pasin i no gutpela long ol ministra i save mekim olsem. Motbeta gavman i mas traina givim sampela mani bilong lukautim ol yet tasol. Ol i save kisim bikpela mani na kirapim bisnis bilong ol.

I luk olsem mipela ol man i stap long ples na taun i amamas long toktok bilong gavman long ol ministra i no mas wok bisnis na politik wantaim long sem taim. Plant i ministra i save wok bisnis na i no save tingting bek long ol pipel i bin votim em olsem maus bilong ol long palamen, long sindaun wantaim ol na kisim wari bilong ol pipel.

Yu husat ministra i save mekim dispela pasin, orait, neks ileksen bai yu lus. Traim na senisim pasin nau yet.

Mi man i stap insait tru long bikbus i raitim dispela pas. Yu husat i gat wari long dispela pas, orait, rait tasol i go long Wantok Niuspepa na bai mi ken ritim.

Paul S. Banai,
C.M. Kanengara/Is Sepik

WATPO BAIM MERI?

Dia Edita - Mi gat bikpela amamas tru long rait long yu. Mi gat wanpela askim olsem. Ol i save tok baim meri. Sampela man i save baim meri long K1,000 kina. Em i wanem samting ka o wanem? Watpo na mipela ol nambis i no save baim meri na ol Hailans i save baim meri? Lukim ol i no smat, tasol ol wari tasol long mani. Em tasol.

David Ooroera,
Kandep/Enga

BAIM WANTOK

Sapos yu laik kisim Wantok niuspepa olgeta wok inap long wan yia streng, yu salim nem na adres bilong yu wantaim K8.00 i kam long:

WANTOK BOX 1982 BOROKO

Long go long Australia em i K14.00.

Long Yurop na Amerika: K18.20 (long sip)

K 24.00 (long balus)

STORI TUMBUNA

BIKPELA HAIWARA.

em, "Yu no ken kaikai dispela pis. Bai mi kilim ol dispela lain manmeri i kaikai pis." Olsem na man ya em i no kaikai pis.

Taim ol i kaikai pinis na bihain ol i kukim marasin bilong pis em i stap insait long bel bilong pis. Na dispela marasin i bruk namel long paia na smok bilong paia i blak tru long antap long skai na draipela ren i pundaun.

Orait, dispela gutpela man em i save long taim bilong ren i pundaun. Olsem na em i kisim tupela kakaruk man na meri na tupela pik na tupela dok na meri pikinini bilong em na paia tu em i kisim. Na ol i go antap long kokonas.

Taim hai wara i kamap bikpela, orait dispela kokonas tu em i go antap tru long skai. Taim ol i stap antap long kokonas na ol i no save long wara. Na ol i brukim trip kokonas na traيم tromoi long graun. Tasol trip kokonas em i pairap long wara, ol i mekem olsem tripela taim na namba 4 ol i brukim' gen narapela trip kokonas na ol i tromoi na em pairap long graun.

Olsem na ol i kilim em na kisim i go long ples bilong kaikai. Tasol dispela man em i driman long nait, na wapelna man i tokim

pinis. Hai wara i kilim ol.

Nau yumi stap hia. Em yumi kamap long tupela manmeri. Na ol animel tu olsem tasol na nau ol i stap stap. Em tasol stori i pinis.

Francis Momori,
K.T.S.,
Erave. S.H.P.



Tambu Toro



Kaunsila TRAIM



HE OL WANTOK... MASKI
TOKTOK NA MAUSWARA
PLANTI. EM I NO
SAVE MEKIM SAMTING
KAMAO.... YU MAS
GO TRAIM. NA
MEKIM.

RABIS DRAM I GAT
WOK BILONG
EM I STAP.
BILISO



BAIBEL STORI

King I Sakim Tok Bilong God

1 Samyuel

13:10 - 15:14



Used by permission of the David C. Cook Foundation. Copyright 1973, David C. Cook Publishing Co. All rights reserved.

SPOT PES



SAUT PASIFIK GEMS 1979

Ol manmeri bilong olgeta Pasifik kantri i wok long trening strong tru long olkain spot, na redi long namba 6 Saut Pasifik Gems em bai ol i holim long dispela yia yet.

Bai ol i hom dispela bikpela pilai long Fiji, long mun Ogas. Fiji em i wanpela kantri we ol i bin holim namba wan Saut Pasifik Gems long yia 1963.

Long dispela namba wan Saut Pasifik Gems i bin i gat moa long 600 manmeri i makim 13 Pasifik kantri i stap insait. Papua Niugini na Nu Kaledonia i-bin pilai strong tru, tasol Fiji i bin go pas long na winim planti medal.

Olgeta Pasifik kantri i stap insait long dispela bikpela pilai bai mas pilaim 5-pela kain spot.

em long resis long ran, resis long swim, pilai basketbal, soka na long tenis.

Bai ol i pilai ol arapela spot olsem boksin, netbal, volibal, resis long tromoi bal, resis long kanu na resis long sutim banara. Na tu pilai wanpela kain spot ol i kolin bedminton, em i wankain olsem tenis, na tu resis long sanap antap long wanpela hap palang na bot i save pulim long wara. Na tu i gat 4-pela arapela spot em bai ol i mekim long dispela taim.

Gavman bilong Fiji i redim pinis 3 million dola long wokim napela ples bilong pilai, na wanpela bot bilong soim o, poin o mak bilong pilai.

Ol i save holim Saut Pasifik Gems bihain long tupela tupela yia, iong wanem, nogut Komanwelt Gems na Olimpik Gems i kamap long wankain taim long wanpela yia tasol.

Long dispela yia yet, samting olsem 300 manmeri bilong PNG bai go pilai long biksiti Suva, long Fiji. Ol i kamapim dispela bikpela pilai long wanem, ol i laikim bai olgeta Pasifik i mas pren gut na mekim spot i go het.

Inap long yia 1963 i kam inap nau, olgeta Pasifik kantri i laikim tru spot, olsem planti bilong ol i gat laik tru long makim kantri bilong ol na go pilai oltaim long taim ol bikpela gem i kamap.




Tripela poto hia i soim ol sampela spotman bilong Saut Pasifik long taim ol i pilai long Moresbi.

Poto antap i soim ol man i wakabaut mas long opim Saut Pasifik Gems long Moresbi. Poto namel i soim ol man sanap kisim medel.

Poto daunbilo i soim P. Yang bilong PNG taim em i mekim save long Onasa'i bilong Wes Samoa.

Long arapela wik bihain bai yumi lukim sampela poto bilong ol man i pilai long ol kain kain spot long Saut Pasifik Gems.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.